



**АНАҒА
ТАҒЫМ**

2-бет



**БАЛАҒАТ СӨЗ
АЙТҚАНДАРҒА
ЖАЗА ҚАТАЛ**

5-бет



ЖЫМЫҚ

8-бет

ЗАН газеті

✉ zangazet@mail.ru

№97 (3628) 26 желтоқсан 2023

ZANMEDIA.KZ

Қоғамдық-саяси, құқықтық газет

БҮГІНГІНІҢ БАС ТАҚЫРЫБЫ

ҰЛТТЫҚ ЖОБАЛАР ҰШПАҚҚА ШЫҒАРМАДЫ



Қазақстанда келесі жылдан бастап 2021 жылғы 12 қазандағы Үкімет қаулыларымен қабылданған 9 Ұлттық жобаның күші жойылады. Оған «Қазақстан Республикасы Үкіметінің кейбір шешімдерінің күші жойылды деп тану туралы» 2023 жылғы 28 қыркүйектегі №828 қаулы түрткі болып отыр.

(Соңы 3-бетте)

МӘСЕЛЕ

ОТБАСЫЛЫҚ ЗОРЛЫҚ- ЗОМБЫЛЫҚ: тараптардың татуласу мүмкіндігі шектелді

Отбасындағы тұрмыстық зомбылық – өзекті әлеуметтік мәселе. Оны жасағандарға жауаптылық Әкімшілік құқық бұзушылық туралы кодекстің «Жеке бастың құқықтарына қол сұғатын әкімшілік құқық бұзушылықтар» деп аталатын 10-тараудағы бірқатар бапта қарастырылған.

Бүгінгі таңда отбасылық-тұрмыстық қатынастар саласындағы заңсыз әрекеттер тыйылмай келеді. Тіпті ол қалыпты жағдайға айналып бара жатқандай. Соған орай зорлық-зомбылыққа қатысты заңға енгізілген маңызды өзгерістерді бірлесе талқылап, түйткілге заңды түрде тосқауыл қоюдың тетігін қарастырған жөн.

Статистикалық көрсеткішке сүйенсек, 2022 жылы Орал қаласының әкімшілік құқық бұзушылықтар жөніндегі мамандандырылған сотында тұрмыстық зорлыққа қатысты 511 іс қаралып, 29 әкімшілік іс тараптардың өзара бітімгершілікке келуіне байланысты медиация тәртібімен қысқартылған. 266 тұлғаға ескерту берілсе, 212 тұлға қамаққа алынып, 4 тұлғаға айыппұл түріндегі жаза тағайындалған. Ал 2023 жылы 1034 іс қаралып, 43 әкімшілік іс тараптардың өзара бітімгершілікке келуіне байланысты қысқартылған. 651 тұлғаға ескерту берілсе, 324 тұлға қамаққа алынып, 15 тұлғаға айыппұл салу түріндегі жаза тағайындалған. Бұл көрсеткіш отбасы-тұрмыстық қатынастар аясындағы құқыққа қарсы әрекеттер 2022 жылға қарағанда 2023 жылы екі есе, яғни, 51 пайызға артқандығын көрсетеді.

ӘҚБТК-нің 73-бабында құқық бұзушыға қатысты ескерту, не үш тәулікке дейінгі мерзімге әкімшілік қамаққа алу түріндегі жазалар қолданылып келген болатын. Ал, 2020 жылғы өзгерістерге сәйкес, мұндай құқық бұзушылық жасаған адамдарға тағайындалатын жаза ескерту жасау немесе бес тәулікке дейінгі мерзімге әкімшілік қамаққа алу болып бекітілді. 2023 жылдың 20 сәуірінде аталған жаза ескерту жасауға не бес тәулікке әкімшілік қамаққа алу болып заңда нақтыланды.

(Соңы 2-бетте)

ЖАНАШЫР

МЫҢ ШАҢЫРАҚТЫ ШАЙҚАЛТПАЙ САҚТАП ҚАЛҒАН СУДЬЯ

Билік айтқанның бәрі би емес, бітімін тапқан би! Осындай ел білетін, жұрт танитын бітімгер бидің бірі – Шымкент қаласының азаматтық істер жөніндегі ауданаралық сотының татуластырушы судьясы Еркен Отарбаев. Әрине, судья Е.Отарбаевқа мың шаңырақты шайқалтпай сақтап қалу оңайға түскен жоқ. Оның осы жолда он жылға жуық тер төккенін біреу білсе, біреу білмес. Сол білмейтіндерге Еркен Бостанбекұлын таныстырған жөн шығар.

Ізденген жетер мұратқа

Мен Ереккенді Әділет министрлігінің Оңтүстік Қазақстан облыстық Сот актілерін орындау департаментінде бөлім басшысы болған кезінен танитын едім. Одан бері де зымырап он үш жыл өтіпті. Сол кезде департаментте қызмет істейтіндер «Отарбаев болмаса, мекеменің жұмысы жүрмей қалатын шығар» дейтін. Өйткені ол күн-түн демей, мыңдаған сот актісінің орындалуы үшін бар білімі мен күш-жігерін жұмсайтын. Бір сөзбен айтқанда, Отарбаевтың өзге қызметкерлерден оқ бойы озық екенін бәрі білетін.

Еркен Бостанбекұлы еңбек жолын 1994 жылы Еңбекші аудандық халық сотында ең төменгі қызмет – сот мәжілісінің хатшысынан бастап, сот жүйесінде 29 жылдан астам еңбек еткен. Сатылап өсіп, 20 жылда ОҚО Сот актілерін орындау департаменті басшысының орынбасарына дейін көтерілді.

Ол 1994–2000 жылдары Еңбекші аудандық халық сотында сот мәжілісінің хатшысы, сот орындаушы, одан кейін ОҚО Сот актілерін орындау департаментінде сот орындаушы болып істеді. 2001–2008 жылдары осы департаменттің Түлкібас аумақтық бөлімінде аға сот орындаушы, одан кейін облыстық департаменттің ұйымдастыру бөлімінде басшы, басқарама бас-

тығы болды. Ал 2011 жылдан бастап ҚР Әділет министрлігінің ОҚО Сот актілерін орындау департаменті басшысының орынбасары қызметін абыроймен атқарып, 2014 жылдың тамыз айында Мемлекет басшысының Жарлығымен Шымкент қаласы Абай аудандық сотына судья болып тағайындалды.

Тараптарды татуластыру тапқырлықты талап етеді

2014–2023 жылдары Е.Отарбаев Шымкент қаласының Абай және Еңбекші аудандық соттарында татуластырушы судья болып істеді. Осы

ретте татуластырушы судьяның кім екенін айта кетсем, бұл бітімгер судья немесе судья медиатор дегенді білдіреді.

Әлбетте, татуластырушы судья болу үшін ең алдымен, адамдарды өзара келісімге, яғни бітімге келтіре алатындай тапқырлық пен шешендік қабілет болу керек! Мұндай қабілет пен қасиет Еркен Бостанбекұлының бойынан табылатын. 2014 жылы қаламызда азаматтық, еңбек, жер, отбасылық және өзге де құқықтық қатынастан туындайтын даулар, сондай-ақ онша ауыр емес және ауырлығы орташа қылмыстар бойынша қаралатын істер көбейді. 2011 жылы қабылданған «Медиация туралы» заң қолданысқа енгеннен, елімізде қаралған барлық істің небәрі 1 пайызы ғана медиация тәртібімен шешілетін. Соған орай 2013 жылы 20 қарашада өткен Қазақстан Судьялар одағының VI съезінде Президент: «Медиация туралы заңнаманың жетілмегендігі біздің еліміздегі даулы жағдайларды реттейтін соттық емес институттардың дамуын тежеп отыр. Биыл барлық істің 1 пайызы ғана медиация тетіктерін пайдаланумен қаралды. Медиация туралы отандық заңнаманы халықаралық стандарттармен сәйкестендіру керек. Бұл Қазақстанның сот жүйесіне оң ықпал етеді, соттардың жүгін жеңілдетуге септігін тигізеді» – дей келе, азаматтық процестің модернизациялап, Азаматтық процестің кодекстің жаңа жобасын жасауды тапсырған болатын.

(Соңы 6-бетте)

